

王安石全集

國學叢書之一



最新標點

上海龍

王安石全集卷十一

古詩

寄題郢州白雪樓

折楊黃華笑者多，陽春白雪和者少，知音四海無幾人，況乃區區郢中小。千載相傳始欲慕，一時獨唱誰能曉，古心以此分冥冥，俚耳至今徒擾擾。朱樓碧瓦何年有，棧桷連空欲驚矯，郢人爛漫醉浮雲，郢女參差躡飛鳥，丘墟餘響難再得，欄檻茲名復誰表，我來欲歌聲更吞，石城寒江暮雲繞。

聖俞爲狄梁公孫作詩要予同作

虎豹不食子，鴟梟不乘雄，人惡甚鳥獸，吾能與成功；愛有以計留，去有勢不容，吾謀適合意，幾亦齒姦鋒。時恩淪九泉，褒取異代忠，堂堂社稷臣，近世孰如公？空使苗裔稱，稱揚得詩翁，一讀亦使我，慨然想餘風。

蒙亭

隱者委所逢，在物無不足，山林與城市，語道歸一轂，詩人論巨細，此指尙局束，頗知區區者，自屏忍所欲。孰識古之人，超然遺耳目，豈於喧與靜，趣舍有偏獨，命亭今何爲，似乃畏驚俗，至意不標揭，小名聊自屬，夏風簷檻寒，冬雪牕戶燠，春樊亂梅柳，秋徑深松菊，壺觴日笑傲，裙屐相追逐，此樂已難言，持琴作新曲。

和王樂道烘蟲

秋水汗流如炙輦，敝衣濕蒸塵垢浣，施施衆蝨當此時，擇肉甘於虎狼餓。咀嚼侵膚未云已，爬搔次骨終無那，時時對客輒自捫，千百所除纔幾箇。皮毛得氣強復活，爪甲流丹真暫破，未能湯沐取一空，且以火攻令少挫，踞爐熾炭已不暇，對竈張衣誠未過，飄零乍若蛾赴燈，驚擾端如蟻旋磨，欲毆百惡死焦灼，肯貸一凶生棄播，已觀細黠無所容，未放老奸終不墮，然臍廊塢患溢世，焚寶鹿臺身易貨，冢中燎入化秦屍，池上焮隨遷莽坐，彼皆勢極就煙埃，況汝命輕倖涕唾，逃藏壞絮尙欲索，埋沒死灰誰復課（一本無此八句）熏心得禍爾莫悔，爛額收功吾可賀，猶殘衆蠹恨未除，自計寧能久安臥。

和聖俞農具詩十五首

田廬

田父結田廬，聊容一身息，呼兒取茅竹，不借鄉人力，起行不入朝，歸臥廬下夕，悠悠各有願，勿笑田廬窄。

樵斧

百金聚一冶，所賦以所遭，此豈異莫耶，奈何獨當樵。朝出在人手，暮歸在人腰；用捨各有時，此日兩無邀。

耕牛

朝耕草茫茫，暮耕水滴滴，朝耕及露下，暮耕連月出。自無一毛利，主有千箱實，皖彼天上星，空名豈余匹！

水車

取車當要津，膏潤及遠野，與天常幹旋，如雨自瀑瀉，置心亦何有，在物偶相假；此理乃可言，安得圓機者。

牧笛

綠草無端倪，牛羊在平地，芊綿杳靄間，落日一橫吹；迢遙送逸響，澶漫寫真意，豈比賣錫人，吹簫販童稚。

颶扇

精良止如留，疏惡去如擯，如擯非爾憎，如留豈吾吝！無心以擇物，誰喜亦誰慍，翁乎勤簸颶，可使糠粃盡。

田漏

占星昏晚中，寒暑已不疑，田家更置漏，寸晷亦欲知。汗與水俱滴，身隨陰屢移，誰當哀此勞，往往奪其時。

牛衣

百獸多自暖，獨牛非氄毛，無衣與卒歲，坐恐得空牢。主人覆護恩，豈啻一綈袍；問爾何以報？離離滿東皋。

耬種

富家種論石，貧家種論斗，富貧同一時，傾瀉應心手。行看萬壑空，坐使千箱有，利物博如此，何慙在牛後。

耒耜

耒耜見於易，聖人取風雷，不有仁智兼，利端誰與開。神農后稷死，殷爾相尋來，山林盡百巧，揉斲無良材。

錢鏹

於易見耒耜，於詩聞錢鏹，百工聖人爲，此最功不薄。欲收禾黍善，先去蒿萊惡，願同欹器悟，更使臣工作。

耨耨

鍛金以爲曲，揉木以爲直，直曲相後先，心手始兩得。秦人望屋食，以此當金革，君勿易耨耨，耨耨勝鋒鏑。

襪履

采采霜露下，披披煙雨中。蒲茅以爲友，絙褐相與同；勿妬市門人，綺紈被奴僮，當慙

邊城戍，擐甲徂春冬。

臺笠

（史記索隱謂蓬累笠也）

耕有春雨濡，耘有秋陽暴，二物應時須，九州同我服。欲爲生少慕，得此自云足，君思周伯陽，所願豈華穀。

耘鼓

逢逢戲場聲，攘攘戰時伍，日落未云休，田家亦良苦。問兒今蠶上，聽此何莽鹵，昨日應官繇，州前看歌舞。

次韻酬微之贈池紙并詩

微之出守秋浦時，椎冰看擣萬穀皮，波工龜手咤今樣，魚網肯數荊州池。霜執奪手賈不售，虹玉喪氣山無輝。方船穩載獻天子，善價徐取供吾私；十年零落尙百一，持以贈我隨清詩，君寧久寄金穀地，方執賜筆磨坳螭。當留此物朝上國，日侍帝側書新儀。不然名山副史本，褻拔元凱誅窮奇，咨子文章非世用，畫鏤空爾糜冰脂，揮毫才足記姓字，竊學文恥從師宜，忽忽點汙亦何忍，嘉貺但覺難爲辭，篇終有意責趙璧，窮國恐誤連城歸，傾囊倒篋聊一

報，安敢坐以秦爲雌。

酬沖卿月晦夜有感

夜雲不見天，況乃星與月；蕭蕭暗塵走，坎坎寒更發；樓歌客尙飲，酩酊不畏雪；巷哭復有人，鄰風送幽咽；紛然各所遇，悲喜孰優劣？君方感莊周，浩蕩擺羈絆，歸來亦置酒，玉指調絃撥，獨我坐無爲，青燈對明滅。

送子思兄參惠州軍

沄沄曲江水，天借九秋色，樓臺飛半空，秀氣盤韶石。載酒填里閭，吹花換朝夕，笙簫震河漢，錦繡爛冠幘，地靈瘴癘絕，人物傾南極，先朝有名臣，臥理訟隨息，稍稍延諸生，談笑與賓客，子來適妙年，謁入交履舄，寂寥九齡後，此獨望一國，虞翻禮丁汜，韓愈俟起德，孤岸鎮頽波，俗流未易識。我方文葆中，旋逐旌旗蹟，去思今豈忘，耳目熟遺迹，吏舍殷勤言，俛仰問乖隔，當時府中兒，侵尋鬢邊白，下帷雖著書，不掄寒餓迫，謂宜門闌士，宦路久烜赫，奈何猶差池，更捧承檄檄，驢摧千里蹄，鵬墮九霄翮，人生無巧愚，天運有通塞，試觀馳聘人，意氣宇宙窄，榮華去路塵，謗辱與山積，優游祿仕間，較計誰失得，送君

強成歌，陟岵翻感激。

送董伯懿歸吉州

我來以喪歸，君至因謫徙，蒼黃憂患中，邂逅遇於此。去年服初除，聽敕相助喜，看君數歸月，但屈兩三指。茫然冬更秋，一笑非願始，籃輿楊柳下，明月芙蕖水，僮僕屢闕門，客罷方隱几，是非評衆詩，成敗斷前史，時時對弈石，漫浪爭生死，送迎皆幅巾，設食但陳米，亦曾戲篇章，揮翰疾嚆矢，君豪才有餘，我老憊先止，東城景陽陌，南望長干紫，欲斷三畝蔬，於焉寄殘齒；經過許後日，唱和猶在耳；新恩忽捨我，欣悵生彼已，江湖北風帆，捩拖卽千里；相逢知何時？莫惜纖與紙！

八月十九日試院夢冲卿

空庭得秋長漫漫，寒露入幕愁衣單，喧喧人語已成市，白日未到扶桑間。永懷所好卻成夢，王色髣髴開心顏，逆知後應不復隔，談笑明月相與閒。

平甫歸飲

無田土相弔，亦以廢燕樂；我官雖在朝，得飲乃不數。詩書向牆戶，賓至無杯杓，空取

上古言，醕之等糟粕，有如楊子雲，歲晚天祿開，但無載酒人，識字真未博，叔兮歸自東，一笑堂上酌；緒餘不及客，兒女聊相酢；高談非世歡，自慰亦不惡；寄言繁華子，此趣由來各。

答陳正叔

天馬志萬里，駕鹽不如閑，壯士困局束，不如棄之完。利行有阨轍，勢涉無恬瀾；明明千里羞，促促一日歡；孰肯避此世，引身取平寬；超然子有意，爲我歌考槃；予方慕孔氏，委吏久盤桓；得失未云殊，聊各趨所安。

過食新城藕

他年過食新城藕，枕藉船中載親友，今年卻到經行處，獨坐昏煙對舞柳。甘酸向口無所適，牢落盤餐與樽酒；冰房玉節漫自好，欲御還休涕垂手。曾參宦學居常近，陽城離別初不久；人閒此願兩未能，西風落日空回首。

明州錢君倚衆樂亭

侯君幕府開東部，名高海曲人知慕，蠟船談笑政卽成，洗滌山川作嘉趣。平泉浩蕩銀河

注，想見明星弄機杼，載沙築成天上路，投虹爲橋取孤嶼；掃除荆棘水中央，碧瓦朱甍隨指顧；春風滿城金版舫，來看置酒新亭上；日女吹笙綵鳳悲，一夫伐鼓靈鼉壯；安期羨門相與遊，方丈蓬萊不更求；酒酣忽跨鯨魚去，陳迹空令此地留。

愛日

雁生陰沙春，冬息陽海澨，冥冥取南北，豈以食爲累。咨予愁病軀，朴鄙人所戲，無才治時難，量力當自棄。豈知塞上霜，飄然亦何事，高堂已白髮，愛日負明義；悲風吹平原，秣馬聊一悵；含懷孰與語，仰屋思歎喟；孟母知身從，萊妻恥人制，一肉儻易謀，萬鍾非得計。

答裴煜道中見寄

君遊苦數歸苦晚，一驛險有千里遠，知君陟降旦暮間，馬力不勁厭長坡。兩脚墜地花枝低，風頭入溪蒲葉偃，此處登臨不奈愁，瓊樹森森遮疊巘。

餘寒

餘寒駕春風，入我征衣裳，捫髻祗得凍，蔽面尙疑創。士耳恐猶墜，馬毛欲吹僵，牢持

有失箸，疾飲無留湯，矐矐扶桑日，出有萬里光，可憐當此時，不濕地上霜，冥冥鴻雁飛，北望去成行，誰言有百鳥，此鳥知陰陽，豈時有必至，前識聖所臧，把酒謝高翰，我知思故鄉。

孤城

孤城回望（一作首）距幾何，記得好處常經過，最思東山煙樹色，更憶南湖秋水波，百年顛倒（一作三年飄忽）如夢寐，萬事乖隔（一作萬事感激）徒悲歌，應須飲酒不復道，今夜江頭明月多。

和微之藥名勸酒

赤車使者錦帳郎，從容珂馬留閑坊，紫芝眉宇傾一坐，笑語但聞雞舌香。藥名勸酒詩實好，陟釐爲我書數行，真珠的皪鳴槽牀，金罍琥珀正可嘗，史君子細看流光，莫惜覓醉衣淋浪，猶醒至死誠可傷，歡華易盡悲酸早，人間沒藥能醫老，寄言歌管衆少年，趁取烏頭未白前。

客至當飲酒二首

結屋在牆陰，閉門讀詩書，懷我平生友，山水異秦吳。杖藜出柴荆，豈無馬與車，窮通適異趣，談笑不相愉；豈復求古人，浩蕩與之俱，客至當飲酒，日月無根株。

二

天提兩輪光，環我屋角走，自從紅顏時，照我至白首，鼎鼎地上土，往往平生友，少年所種樹，硃礫行復朽，古人有真意，獨在無好醜，冥冥誰與論，客至當飲酒。

乙未冬婦子病至春不已

天旋無窮走日月，青髮能禁幾回首，兒呻婦嘆冬復春，強欲笑歌難發口。黃卷幽尋非貴嗜，藜牀穩臥雖貧有，二物長乖亦可憐，一生所得猶多苟。

強起

寒堂耿不寐，轆轤聞車聲，不知誰家兒，先我霜上行。歎息夜未央，遽呼置前楹，推枕欲強起，問知星正明，昧旦聖所勉，齊詩有雞鳴，嗟予以竊食，更覺負平生。

飲裴侯家

裴侯飲我日向中，四坐賓客顏皆紅，掃除高館邀我入，自出糶麥憐民窮，天邊眼力破萬

里，桑麻冥冥山四起，野心探尋殊未已，更欲瀟衣北城水。忽見碧樹櫻桃懸，下馬恣食不論錢，赤星磊落入我眼，恐是半醉遊青天。裴侯方坐塵沙裏，沒身救物當如此，我曹偶脫簿領間，何忍愛惜一日閒，且歸拂席飽眠睡，明日更看滌南山。

送謝師宰赴任楚州

珠玉不自貴，故爲人所憐，賢愚亦如此，好惡有自然。聞子欲東南，使我抱幽悵；炎風沙土中，甘與子留連；大梁非無客，跪起廢食眠；相看獨不厭，以此知子賢；衰氣以難強，壯心方少年；才高豈易得，勗子在雕鐫。

二

崐崙一支流向東，七月八月船如風；愛君少壯此行樂，恨我留連成老翁；仲頭兩岸水無窮，伏檻荷花滿地紅，當時不得君攜手，今日山川在眼中。

次韻遊山門寺望文脊山

宣城百山間，文脊尤奇峯，拔出飛鳥上，圖畫難爲容。聞昔有幽人，捫蘿追赤松，遺形此古室，孤坐鹿裘重。人去邈不反，洞壑空藏龍；側行蒼崖煙，俯仰求靈蹤；遊者如可得，

感棄萬戶封；安能久塵土，傾倒相迎逢。

車螯

海於天地間，萬物無不容，車螯亦其一，埋沒沙水中。獨取常苦易，衛生乏明聰；機械誰使然，含蓄略相同；坐欲腸胃得，要令湯火攻；置之先生盤，噉客爲一空；蟹夏怪四坐，不論殼之功，狼籍堆左右，棄置任兒童；何當強收拾，持問大醫工。

疥

浮陽燥欲出，陰濕與之戰，燥濕相留連，蟲出乃投間。搔膚血至股，解衣燎鑪炭；方其愜心時，更自無可患；呼醫急治之，莫惜千金散，有樂卽有苦，愜心非所願。

王安石全集卷十二

古詩

和平甫舟中望九華山二首

楚越千萬山，雄奇此山兼。盤根雖巨狀，其末乃脩纖。去縣尚百里，側身勇前瞻。蕭條煙嵐上，縹緲浮青尖。徐行稍復逼，所矚亦已添。精神去塵壘，氣象來漸漸。御席取近岸，移船傍蒼兼。窺觀坐窮晡，未覺晷刻淹。江空萬物息，四面波瀾恬。峨然九女鬟，爲出一鏡匱。臥送秋月沒，起看朝陽暹。遊氛蕩無餘，瑣細得盡覘。陵空翠纓直，照影寒銕鉞。冢木立紺髮，崖林張紫髯。變態生倏忽，雖神詎能占。當留老吾身，少駐誰云壓。惜哉秦漢君，黃屋上衡潛。等之事嬉遊，捨此何其廉。我疑二后荒，神物久已厭。埋藏在雲霧，不欲登昏儉。又疑避褻封，蔽匿以爲謙。或是古史書，脫落簡與籤。當時備巡遊，今不在細縑。終南秦之望，泰山魯所膺。天王與秩祭，俎豆羅醢醢。苟能澤下民，維此遠亦沾。方今東雨旱，

十脉燥不黏，尙無膚寸功，豈免竊食嫌；神莽吾難知，士病吾能砭；文章巧傳會，智術工飛
 箝；薦寶互珪璧，論材自樛樛；苟以飾婦妾，謬云活蒼黔；豈如幽人樂，茲山談閭閻；穴石
 作戶牖，垂泉當門簾；尋奇出後徑，覽勝倚前簷；超然往不返，舉世徒咕咕；高興寄日月，
 千秋伴烏蟾；遐追商洛翁，秦火不能炎；近慕楚穆生，意脫楚人鉗，吾意竊所尙，人謀諒難
 僉。

二

誰謂九華遠，吾身未嘗詹；唱篇每起予，予口安能箝；憶在秋浦北，空江上新蟾；光潔
 寫一鏡，廻環兩堤奩；露坐引衣襟，風行歆帽簷；維舟當此時，巨細得盡瞻；試嘗論大略，
 次乃述微纖；此山廣以深，包畜萬物兼；嘯雲吐霧雨，生育靡不漸；巍然如九皇，德澤四海
 沾；此山相後先，各出羣峯尖；毅然如九官，羅立在堂廉，挺身百辟上，附麗無姦儉；此山
 高且寒，五月不覺炎；草樹萋已綠，冰霜尙涵淹；頽然如九老，白髮連蒼髯；此山當無雲，
 秀色鬱以添；姹然如九女，靚飾出重簾，珮環與巾裙，紺玉青紈縑；遠之妍西施，近或醜無
 鹽，變態不可窮，詩者徒咕咕；我初勇一往，役世難安恬；浪荒不走職，民瘼當誰砭；乖離